

四庫全書

集部

欽定四庫全書

集部
荆川集卷十一

詳校官監察御史臣曹坦

中書臣劉源溥覆勘

總校官進士臣繆琪

校對官中書臣田尹衡

謄錄監生臣馮堪

欽定四庫全書

荆川集卷十一

明 唐順之 撰

行狀

月樓唐翁行狀

月樓唐翁武進人也諱世美字某月樓其號大父封寺副諱某者生五子仲子復為大理寺副後守平樂有宦績載在國志封寺副之少子贈給事中諱某號友蘭翁

生四子長子為給事中翁其第三子翁貌魁岸為人個
儻負氣嘗從伯兄給事公指受章句能涉獵記誦然家
故產薄而友蘭翁又病癰臥米鹽醫藥婚嫁百費叢於
伯兄伯兄又方日夜治經史聚徒而教之其勢不相給
也翁以故廢其學而營於家翁雖已不治經然不輟文
墨其閒時則作為草書遂窮極奇變闔閭閃縮上逼懷
素詩歌有唐人風骨是時翁伯兄既以文雄於當世而季
弟竹窓翁善畫尤以草蟲名一時言文章字畫歸唐氏

云伯兄為給事中值敬皇帝在位言官甚見親幸有權
給事公素小心慎事屢為書與翁大要教之謙下毋輒
入州縣門即入必偃僂不得騎閭巷往來戢族屬僮奴
不得鬧街市中翁遵其說而行之是以唐氏雖世宦然
未嘗有子弟為鄉里所苦者後三十餘年嘉靖某甲子
翁年七十餘郡太守請與蜡賓後若干年詔賜天下老
人粟帛八十以上冠帶翁於是始冠帶然始一服之後
不更服也嘗一與蜡賓後太守連歲以故事請然亦不

更往其好省事如此始翁壯時唐氏以給事公故方盛
給事公自為庠生有名聲已能盡致數邑客後為給事
賓客益輳翁家居則應接賓客出則從親朋隣里邀請
酒殽之會投壺陸博遨遊宴笑之歡碌碌不絕翁每所
過輒為上客議論常推其一座人以是人益貌之後翁
既老兄弟物故盡平生故人多不存存者亦衰且病不
能相往來矣翁又失其壯子獨攜二幼孫以居雖門外
終歲率不一出甘脆滫瀡所以輔老之具亦不能豐也

時時有一二族子問起居翁據牀坐與之道說故事助
遣歲時而已人謂翁由喧熱至落莫不能無介介翁獨
脩然自得也然自翁而上友蘭翁年至四十有幾翁伯
兄仲兄亦皆不及五十而卒竹憲翁卒以五十而翁在
父子兄弟中獨巋然老壽至於八十有三其所得可不
謂厚也歟翁配云云葬以卒後三月某甲子在黃塘祖
塋之次於是一之圖所以不朽翁而欲請銘於立言君
子乃謂順之述其事略順之於翁為姪孫而給事公之

孫云

墓表

春坊中允方泉李君墓表

方泉李君既卒其父推官公謂余與君同寮相好也以書來請余表君之墓君姓李氏諱學詩字正夫世為萊州府平度州人大父諱琮父推官公慧也生二子而君為長君少穎異沈靜治經通尚書乙酉秋郡守李君霆夢桃花洞中一少年得雋已而君中試君結廬讀書處

則桃花洞之麓也丙戌第進士為永平府推官法麗於情數決滯獄三年以薦召入為稽勲司主事頃之陞考功司員外郎會朝覲考察君與有司佐其長僚黜陟用精已而調文選員外郎君之在考功也而余亦入為考功主事始與君相識君為人豐肉踈眉目進止雍容與人接婉婉若處女腹中坦坦不蓄鱗甲以此能在處協于僚友間其治獄也未嘗以鉤距為巧其考課也未嘗以按吏為功是時都御史王浚川公有物望不輕一言

假人自君為諸生而浚川公為提學則已奇君後君居吏部浚川公熟視君益以為遠器數言於諸公卿間諸公卿自是知君亦以為遠器也君居間獨喜為詩然在衆中絕口未嘗言詩其自晦多如是在文選未幾改官為翰林院編修頃之丁母楊宜人憂既葬廬於墓側產芝三本高尺許然君不自以為瑞而亦不言於人服除赴官戊戌春同考會試事已亥東朝建君拜左春坊左中允兼翰林院修撰未幾充經筵講官庚子秋主順天

府鄉試踰年以病卒嘉靖辛丑六月某日也年三十有九君之入翰林也是時與君同入先後十有一人皆取之科道與諸部屬而君與余則皆自吏部入居二年余罷歸而編修鄞陳君東出為按察僉事是年編修山陽盧君淮卒明年修撰東平王君汝孝出為按察副使又三年余起為春坊司諫是年中允閩陳君節之卒明年陳君東以副使卒是年余再罷歸明年而君又卒嗚呼維昔官翰林者進士高甲與庶吉士兩塗而已今天子

在位以為此不足以博求碩士遂改其制癸巳之歲乃得君等十有一人於是此十有一人者入則陪侍經幄退則校讐東觀景從饗附人思自竭以報殊恩暇則相與接杯酒或限韻賦詩分曹壺奕或雜以詼諧嘲笑以極文儒墨士之樂于此之時彬彬雅雅爭先恐後何其盛耶七八年間在鬼錄者幾及其半出者罷者亦又幾人其尚在院者纔兩三人耳嗚呼何其有終之鮮與自古文儒之士委棄於草野者不少乃其間得自致於金

馬王堂之列以桀然自見其才者千百而一兩人耳其
遇不可謂不幸天子度常格而用人亦冀以得魁梧瓌
偉之雋蓋蒐於千百庶僚之中獲此數人其致之不可
謂不艱而淪落銷歇若此其奄忽也豈非憐才者之所
嘆與故為表君之墓而并名其人以志余之所感云

戶部主事陳君墓表

嘉靖己丑歲吾郡之士同舉進士者凡八人于是此八
人者得羣然咸聚於京師未幾則或去或留或去者復

留而留者又踵以去其間得相聚京師者率不過四五人或三二人再不能及于八人之數而其後無錫張君舜舉與余相繼罷去則此八人之中罷其兩人其後江陰陳君又卒於京師此八人之中喪其一人矣嗚呼是可嘆也憶昔此八人相與日夕具杯酒相歡笑此時固亦知其聚者終不能不散然殊不意其遽然遽散去猶冀且復聚縱使散去不復聚亦不意升沈存沒邈然分隔遽至於此然此猶七八年之間耳使更復此七八年

或數十年則人事之錯迕消息愈益不齊而其聚散升沈存沒之感計亦不止如此而已嗚呼此可以知人生之若浮與天地之為逆旅矣而亦何恠其然也歟然方其聚也則為歡然以喜其散也則為之慨然以憶其罷而去也則或為之悵然以唁其沒而不可作也則或為之歔噓流涕以悲亦有情者之所不能已歟然則子達之亡此七人者莫不悲焉而余獨有所深悲于子達者以子達有樸茂愿慤之質有務為君子之志而學未及

充乎其質力未及竟乎其志非惟大官老壽限于命而不可得而問學事業之可以自致者亦若有所限焉而未究乎其止也此子達之所以為悲歟彼區區聚散升沈存沒之感固又不足較矣子達諱詞自號茶丘居士以進士授戶部山東司主事歷官若干年而卒卒時年纔三十有六陳氏故饒於貲而君能刻苦自植立其在衆人中衣裳言貌絕不類紛華子弟而其在官絕不營營然廣交游借聲譽為富人事其為戶部嘗監太倉軍

儲又監淮安清江浦漕務最後檢校諸司章奏皆精鍊
謹潔能于其官而君自少孤事其叔青田如事父之禮
友其從兄子和如其親弟兄家之筦鑰一總于青田而
君不知焉君出入必稟命于青田翁而後從事觀君之
居家與其居官而予所稱君之質與其志大率可知也
君始有二子而天後君卒之八月其妻吳安人始生一
子名之曰之才安人系出恭靖侯良之後有賢行而青
田又為之綱紀于外其必能相與立孤以成君志也嗚

呼陳氏之以善聞也久矣而君父故山公既舉於鄉又不顯以死至君且顯矣而天又嗇之固將以昌其後乎曩癸巳之歲余再官京師會君亦繼至于是所謂八人者獨余與君二人在京師後雖繼有至者又不久以去而君與余至再更寒暑而後別且以余之迂戇無似幸不為此七人所棄斥而君尤若以余為可與者蓋君於余交深而信篤如此君之沒余安得默然無一言也君墓誌行狀既自屬于學士張公與戶部主事曹君獨墓

表未有所屬青田翁以請於余蓋君未嘗有言而青田翁揣知君之意或在余也君世譜履歷則誌已詳故余獨序交游始終以道君之可悲者以揭于君之墓而又將以貽諸此六人者云

都察院都事秦君墓表

錫之言孝弟篤行有家法者必歸秦氏秦氏之先貞靜先生諱旭隱居行誼既沒而鄉人私謚貞靜先生以長子夔官封中憲大夫然鄉人不稱其官而稱之曰貞靜

先生貞靜次子永孚以孝子旌弟仲孚亦孝鄉人稱之
曰雙孝秦氏君諱鏜字國和號類樗山人貞靜先生之
孫而孝子公之子也自少為邑諸生治所謂時文者最
精每御史歲試諸生諸生心擬甲乙多目君君亦每自
負及案出卒無前君者然六試於鄉而後第五試於會
皆不第已而罷試家居若干年嘉靖辛丑即家授南京
都察院都事以卒年七十有九君之罷試也以親老且
病故竟二親死君亦遂不仕也曰吾祿不及吾親乃欲

以衰年為子孫竊祿耶初孝子公事其父貞靜與其母
殷恭人惟其志而不忍傷至於刺血吮瘡不憚為之及
君事孝子公一如其所以事貞靜者其事母張孺人一
如其所以事殷恭人者孝子公仁慈儉朴君為是羣下
不輕鞭呵中堂無叱咤之聲平生自饗七筯不出蔬豆
之外懼少失孝子公意張孺人嘗病癱不能起又瘖不
能言君以意揣其寒溫飽饑而時食衣之便溺起坐必
君自扶抱朝夕必侍如是者十九年雖女使亦不以屬

然此蓋君之所謂孝者即甚勞勩亦不過乎煦愉抑搔
人子之常事獨念君束髮即以文自奮人亦期君於當
時所謂功名顯榮縱不有得于前必有得于後而君乃
銳然自割於強盛之年非孝愛純至一不中熱於世味
有所不能是則難耳抑人亦有言子而仕雖有離憂樂
也子而在側雖無離憂不樂也人情豈異是哉君乃能
使其親忘乎人情之所樂而深樂乎人情之所不樂者
其必有委曲感移乎親之心而人不能知是尤所以為

難也君事寡姊曲有恩禮姊亦以節見旌君為人悃悃
無表暴之飾然重節緊厲廉隅不妄交游不輕謁於有
司君既自以詩書行誼守為家法於教子孫也尤篤子
孫化之街衢之間褒衣矩步不問可知其為君家弟子
庚子歲子涵孫禾舉於鄉癸卯孫梁又舉鄉之人不以
子孫之壻於榮進為秦氏賀而以子孫恂恂謹讓守家
法為秦氏賀也蓋吾友施君子羽狀君之行而為之說
以比於漢石氏其說然矣然石氏自建慶而下不再世

孝謹遂哀豈非其質行有餘而詩書學問之澤不足以維持之耶有石氏之孝弟矣而又能從事乎齊魯諸儒之所謂文學者以益修乎其所未至則秦氏孝謹之風其將不衰矣乎余故因表君之墓而并書之以詔其後之人

晉安州判杭君墓表

嗚呼是為吾友宜興杭君錫賢之墓杭君諱封錫賢其字號日惺布政澤西公之子都御史雙溪公之兄子也

乙未歲余罷官歸客宜興寔館於君余性褊且戇在鄉
曲子子不能與人為同然獨嘗心善君君自少以宦游
子弟著文行其所結納多海內知名之士顧余何取然
君與余獨深相好也以是于君乎館余所館距君所居
五六十里君數數往來候余或相對一室講論經史或
邀余游東西溪及銅官諸山所至輒盤桓竟日或相與
賦詩為樂余是時居常以病謝客然於君之來未嘗不
喜余於山水亦雅不甚好然於君之請未嘗不從與君

處久而益津津有味而亦益知君之為人君外和而中
介其遇事小心能忍待人依於謙厚於好善尤篤甚於
世之嗜勢利者其臭味苟同雖其四海九州之人君縱
不能徧與之接然其心未嘗不慕而求之其臭味苟不
同雖其里閭姻戚之人君縱強與之接然其心未嘗不
踈而遠之其慕而求之也然未嘗翕翕以相驩其踈而
遠之也然未嘗悻悻以相忤余以是益信君為長者余
既居宜興兩年會有春坊司諫之命去如京師未幾君

亦以選入就試北畿復得與君日夕往來如宜興時君居京師尤自守不妄與人交獨余所善吉水羅達夫富順熊叔仁平涼趙景仁君介余徧與之游甚狎至於大官勢人之門雖君力能自通然絕不往也始君少時從澤西公在京師學於翰林諸先生其為文有矩矱為縣諸生已能出名聲然數試不利後為太學生師事湛甘泉呂經野鄒東郭三先生三先生亦深器君君益思自奮及余與君會宜興則君年且五十矣而其氣不少衰

時時作為文章包羅馳騁沛如也既試北畿又不利于
是始就選有勸以賂者君慨然曰吾父吾叔並以直節
蒞官吾縱不能似柰何以此為吾父吾叔羞竟不肯于
是選普安州判官歸至淮病卒年五十有七自君在京
師而余以狂言再謫為民君送我於崇文門外昵昵不
能別且謂余曰君去吾亦歸矣與君結廬深山以老焉
可也未幾而君竟死嗚呼余烏得無情哉乃為敘始終
游從之故與君為人之大略而書之於其墓

按察司照磨吳君墓表

文字之變於今世極矣古者秉是非之公以榮辱其人故
史與銘相並而行其異者史則美惡兼載銘則稱美而不
稱惡美惡兼載則以善善為予以惡惡為奪予與奪並故
其為教也章稱美而不稱惡則以得銘為予以不得銘
為奪奪因予顯故其為教也微義主於兼載則雖家人
里巷之碎事可以廣異聞者亦或採焉故其為體也不
嫌於詳義主於兼美則非勞臣烈士之殊迹可以繫世

風者率不列焉故其為體不嫌於簡是銘較之史猶嚴也後世史與銘皆非古矣而銘之濫且誣也尤甚漢蔡中郎以一代史才自負至其所為碑文則自以為多愧辭豈中郎知嚴於史而不知嚴於銘耶然則銘之不足據以輕重也在漢而已然今又何恠余兩為史官皆以不稱罷而姻戚間里以其嘗職史故往往以銘辭見屬嗚呼試點檢前後所為銘其如中郎之愧辭者有之乎無也余進而位於朝不能信予奪於其史退而處於鄉

不能信予奪於其銘是余罪也雖然予奪非余之所敢也是以欲絕筆於銘焉其或牽於一二親故之請有不能盡絕者則謹書其姓名里官系世卒葬月日此外則不敢輕置一言雖不盡應古銘法亦庶幾從簡近古之意焉墓有銘有表表亦銘也今予所為表者是維按察司照磨吳君之墓據君之族孫進士禎所為狀君諱文字從周號鯁齋世為無錫之間江大父諱某云云君少讀書為邑諸生後援例入太學凡兩試不中第已而選

福寧州幕官陞山東按察司照磨不赴任遂乞致仕家居凡幾年病脾一歲卒嘉靖某年月日也年七十有五墓在閭江第二灣祖塋之次葬以卒之又明年某月某日將葬君之二子志慰詣余請文而君族弟從夏實為之先二子且致君遺言曰吾死汝必於唐太史乞言焉從夏為吾母任宜人後母之弟其人恬靜有守余雅重之故其為君請不可辭而余嘗兩會君於京師其氣溫然謙厚人也始改官而乞身賢乎冒競不知返者君之

遺言又如此嗚呼君豈以余不能為愧辭也故余敘所以不敢輕為銘之說及所以銘君之故而謹書君之姓名里宦系世卒葬月日為文而授之志慰使鑣諸墓上

華三山墓表

華三山翁諱從智字克禎按察副使金之父也副使為戶部主事時封翁以其官副使廉靜樸木有古人之風余心敬慕其為人後乃稍聞三山公之行事而知副使之樹立有自也則又敬慕三山翁已而得翁所為余山

百詠詩其語類古之隱君子自足於一丘一壑而不好
於物者余嘗欲走余山訪翁以庶幾獲見所謂山澤之
臞而未能也嘉靖壬寅四月十有四日翁以病卒年八
十有二於是副使來請余表君之墓嗚呼余於翁有感
矣翁生為富人而以子貴為封官諸富人率陰陽予奪
多其網絡以力爭雖刀其貴人父兄或憑其氣力漁獵
其人饜其谿心翁乃約已而豐人一切屏機穽不事費
田宅從其贏斂租息從其衲衣食人也從其贏自衣食

也從其朒又諸富人與貴人父兄率飾冠帶都騶奴日夜碌碌以刺候造請結納為事以厚其交而多其勢或時節往來府縣門入則僂僂柔色詞以媚出則詡詡張眉目以矜翁獨一切謝去塞竇自藏在余山三十年束帶見賓客之日可數也蓋翁之泊於利而疏於勢若此宜其發之詩歌而特有類乎古之隱君子也哉余是以諾副使君之請而表於其墓翁墓在余山翁所自營也翁少嘗力於治生以逸其父西野翁後西野翁沒翁遂

去其故居而老於余乃自為塋塚因山而壘植一木必其材斃一石必其無泐費可若干金以上經營勤瘁且數十年而後完雖然古有說矣聲利腐鼠也形骸委蛻也故達者解焉翁雖不恡情於其一乃若不能不恡情於其一焉者何耶且夫役其一生之力營營焉以計其身後委蛻之藏與彼役其一生之力營營焉以計其身前腐鼠之奉其較亦何能大相遠而翁乃耽之不置其亦未可以為達歟或曰唐司空生嘗為之矣司空生達

人也故達乎死生之際則王孫之裸葬可也司空生之
自為塋塚而飲酒賦詩其中可也翁父西野翁諱某祖
某家於無錫之鵝湖華氏自翁十五世祖當宋南渡始
自汴徙無錫居某地幾世祖自某地徙某地而五世祖
又自某地徙鵝湖其墓亦隨所徙族大而墓散往往蔽
草莽間翁遂為巨碑數通各題小傳碣諸其墓為識而
翁始墓於余翁配云云

莆田林氏先墓表

莆田林君華述其先人之行而請余為之表於其墓曰
少而為儒老而投閒其績文強記推於士人而好施善
忍著於鄉曲自少孤獨與母居母或不懌輒臥不食則
跪俯牀下求親黨慰解百方母懌然後跪為之起母食
然後食是吾大父洗心公之行也雖不為儒生章句然
喜誦詩書旁及簫管歌曲卜筮星歷之學尤精康節易
數而時諷其所為擊壤詩故其平生遇歡愉窮窘悲愁
死生之變以為是數也嗒然絕不以逆順生心少喪母

喪哭之目盡腫數至失明後遭父喪窶不能給則躬負尸於牀而鬻衣質屋以供含襲其後繼母寡居而家又窶甚滫瀡襦縕之奉有豐無缺是吾父敬菴公之行也寒煖飽饑起居盥類事關舅姑者以身任之不以勞相遺井汲竈燎器滌衣澣棗栗挑剔家之瑣細事關妯娌者以身先之不以難相推諸妯娌見其卑柔或侮以非意則善解遣之復有煦濡翕訛者又正色拒之久之諸妯娌皆服而舅姑則益喜是吾母周安人之行也嗟乎

華不幸十三而喪吾大父十七而喪吾母二十而喪吾父空乏顛沛不能存然思先人之義即以不忘溝壑自厲嘗乏食竟日危坐讀易或雪夜衣絺覆草獨處慷慨歌聲達旦益奮激不改以先人遺教在不敢背也華自壬辰登第至於今十有四年而任今職所居官處患難臨民益思砥礪名節深以罔上殘下冒進壞道為耻以先人遺教在不忍玷也大懼先人之善泯墜不紀是以日夜悼心惟君與華相知深敢以累君華之請余文也

蓋在知鎮江之二年余諾之而未有以應也後二年御史奏華激變事被逮京師華以書別余曰苟君不遺余先人而終賜之華即死瞑矣華發鎮江哭而送之江者幾萬人擁傳車不能行逮者愕眙且笑曰是可以為激變矣華至京師上奏自辨天子以為直而京師諸貴人亦多言華枉者於是天子竟不深罪華而罷為民以歸華於道遣其弟華以書來曰華誠不自意復奉先人丘墓惟君所以嘉惠先人者願終賜之嗚呼余於是益感

涉世之難也將為蘧蓀戚施嚶咿唯阿苞苴承迎之行
可以無譴訶憎疾於人然或不免譴訶憎疾於鬼神而
且遺先人以惡名將為矯世厲俗捐私奉公蘄崖狷潔
之行可以無譴訶憎疾於鬼神然或不免譴訶憎疾於
人甚者為世戮辱以憂丘壠是兩者不知其孰可也以
華之自處固以謂可以無譴訶憎疾於鬼神而貽先人
以令名然卒不免譴訶憎疾於人既觸法矣然猶得免
僇辱以奉先人丘壠以不為譴訶憎疾者所快蓋非天

子聖明至仁保全善類則不及此故特為紀之以著於世且使世之人知種德積行雖堯坎其身必發之於其子孫如林氏之先人秉道守正雖遭罹讒疾終獲保全如華者以為仁人志士之勸其於世教未必無補云

彭翠岩處士墓表

古之人有書其人之墓者必其智足以知其人者也智不足以知其人而據其所傳聞書之雖其當實君子且以為近誣而況其不當實者乎雖或知不足以知其人

而知其子弟則為之書其父兄者今往往有之然其不失實者亦或少矣自余稍知為文惟書人之墓則尤不敢不謹知不足以知其人不敢書雖或知其子弟而亦不敢以書其父兄今余既未足以知處士而又未獲游於處士之子郡推君而特為之書者蓋郡推君之僚于余父也最久而余父之知郡推君也最深則因余父以知郡推君之為人而因郡推君之所稱述者以知處士之為人其亦庶乎可以不失實焉否也按狀處士諱顥

遵道其字處士居常自言曰拙可以勤補而窘可以儉裕故其俯拾仰取凡所以家人生產之計未嘗不出於勤而其服食器具凡其所以自奉未嘗不出于儉然至貧不能屋者為之屋貸而不能償者還其券或遇賢士君子其將迎而贈送之也必恭其貌而豐其儀故士君子樂與之游而鄉之人不病其為纖嗇也其更徭賦後凡所以急公家之事者先於所以謀其私至於體其同室之休戚通其有無而孔懷其死喪其所以為其父母

之子者先於所以為其子處士既自以不能讀書為儒而獨屬意於郡推君郡推君之少也擇師教之而時督之曰若賴祖父餘業幸無飢寒而不刻骨自植立而惰窳以敗是羞余也嘉靖壬午郡推君舉於鄉處士且喜且督之曰更志其大者可也蓋郡推君述處士之行大略如此而余父為余言郡推君之為人縮縮謹甚其治獄多所貸舍不以鍛鍊為能雖鞭楚常恐傷之是殆有聞於處士長者之教乎余是以因余父以知郡推公因

郡推公以知處士而為之記之也處士祖希載父德甫
自處士祖父而上皆不仕而處士有子澄始舉於鄉今
為永州府推官配晏孺人狀以為安祥雍肅能助處士
之不逮者也子三人長即澄次渾太學生皆晏出也次
深側出也孫男六人天祿天初天視天祐而天祿天初
天祐皆邑庠生天視太學生其二也幼未名處士卒於
嘉靖某年月日年六十有三晏孺人卒於某年月日年
五十有九至嘉靖丙申十一月日始合葬於萬載縣北

九子石之岡處士系出宋待制忠肅公龜年之後世居
臨江之清江至六世祖始徙袁之萬載城東而翁又構
別業於城北龍溪之潁龍溪迤南有岩積翠作亭其上
而自號曰翠岩處士余因為之表曰是維翠岩處士之
墓云

傳

周襄敏公傳

公姓周氏諱金字子庚號約菴其先武進人也國初有

彥居者以閭右徙南京因家焉至公為都御史復還居
武進彥居生贈戶部尚書道信妻贈夫人董氏於公為
祖妣道信生贈戶部尚書廣妻贈夫人張氏於公為考
妣墳墓皆在南京而公始賜葬於武進之惠化鄉公自
弱冠為應天學生弘治甲子舉鄉試正德戊辰舉進士
擢給事中陞太僕少卿僉都御史轉副都御史致仕家
居六年以薦起為副都御史陞兵部侍郎轉右都御史尋
轉左陞尚書南京南京公所生長也因得焚黃先人之

墓南京人以為榮公之始為給事也於戶右於工左於
兵復都於戶凡歷三科為都御史也僉於延綏副於宣
府於保定右左於淮鳳凡歷四地為尚書也於刑於戶
凡兩部公所歷多在錢穀刑名兵戎劇曹與邊腹要地
公為人闊達警敏自在科中則已練習人情世務章數
十餘上度可施行而後言不效迂生敢言而已武廟數
游幸晏朝公上疏請復常朝之規退則躬覽章奏以總
權綱亦頗見采納時貴寵用事國儲蠹於冗食公言京

糧歲入三百五萬而食者歲乃四百三萬乞痛加澄汰
便又言中官以迎佛以織造濫討引鹽暴橫道路又言
都督馬昂納女弟後宮外議或云已娠請誅昂而還其
女弟後昂雖不罪而女竟被黜及公沒禮部為公請贈
諡亦獨以公為給事時能陰銷禍孽指此疏也方是時
奄宰相繼擅勢尤與言路為仇不旦暮死則竄少能全
者公在科九年卒以老成周慎免於戮辱而以久次得
擢為太僕公貌瓌偉善議論其在科中每九卿廷議軍

機大事邊境要害衆輒目屬公公口對甚辨聞者莫不
心愜壬申狼山之捷兵部議有功將士例陞三級公笑
曰不然將士有實職有虛銜有正副叅遊實職大而虛
銜反小有管哨管隊實職小而虛銜反大今一例陞級
則管哨以下皆可為督府而叅副以上或止於都司首
尾倒置非便衆是之癸酉廷議用兵土番復哈密公極
言西邊虛憊而土番險遠且青海之賊窺伺西寧乃欲
遠拯哈密譬之人家囊篋空虛子弟臧獲疲死而盜賊

滿門庭將拯門庭之寇乎抑急比隣之灾乎衆曰是則然矣如土番索金幣何公曰彼能效順國家何愛於賞不然勦之未晚也已而卒從公議于是衆以公可屬邊事推延綏則推公推宣府則推公公既家居廷臣交口薦猶尚以邊事也公在兩鎮值寧夏甘肅大同三變之後公既素豁達不拘謏有帥臣體裁又善煦愉接下邊人見公色詞既已心安公公益務寬簡繩法以煥休慰帖之嘗欲答一二走卒時窮冬多不袴公見之惻然曰

邊人窘乃若是遂不忍咎而百方為之招商聚粟廣屯積芻以時給其食使人人有重生之心又為之葺墩墻以衛其居疏石渠以足其水凡有規畫期於利盡而不勞邊人益愛公嘉靖甲申公在延綏會大同殺都御史報至公諤然因入靜室蹰蹰久之喜曰吾得之矣乃開門召諸將吏軍卒盡入環列庭下謂之曰若輩知大同殺都御史乎衆曰知之公曰若輩以殺之為得已耶非得已耶衆叩頭曰狂賊自取族耳尚何道公曰不然

邊人勞苦甚矣而又虐使之是趣之殺也假令上下素
相愛若父子彼將倚以為命縱授之刃使殺焉其誰忍
乎衆大懽呼叩頭退當是時以片言立解上下疑阻公
自喜得應機之知居家時數嘗為余言之其在宣府總
督馮侍郎以苛刻失衆心公數爭之不能得侍郎又以
引鹽數萬與其私人為市而平時商人無能得一引者
衆固甚怨會諸軍詣侍郎請糧不得且欲鞭之衆遂憤
轟然面罵因圍帥府公時以病告諸屬奔竄入院泣告

公公曰吾在也毋恐即便服出坐院門召諸把總官陽罵曰是若輩剝削之過不然諸軍豈不自愛而至此欲盡痛鞭之軍士聞公不委罪若屬也則氣固已平乃擁跪而前為諸把總請曰非若輩罪也是總制者罔利不卹我衆耳公從容懇諭以利害衆囂曰公生我始解散去而總制自是亦心愧公延宣皆要衝公內撫軍情外策強敵闕城晏閉邊氓緩帶兩鎮四五年訖無敗事人益以為才然公他所施設其與公不同趣者或不能不

以好惡為贊毀至論公長於治邊則莫得而訾也自公去宣府八年而大同復殺總兵據城亂公時起巡撫保定矣遂往扼紫荆擒大同謀者數人送京師會真定巡按李者有疑疾入某邑有銃聲驚以邑令謀已欲扶死之廣平守爭之又以守亦謀已至遣吏發卒圍廣平捕守一城盡空公聞變星馳往撫定之上章露巡按罪狀而臺長庇其屬為之訟寃公復上章力辨廷論竟直公而黜御史巡按於巡撫為同事而臺長又於公寮長也

公本通達不務為崖異立硤硤名然利害大體所在不肯苟為媿媿此蓋公所難者其以都御史出鎮淮淮當士大夫南北衝地過者或不愜所望則益易為謗然公自如也丙申章聖梓宮南祔始奉旨由江而諸護行大臣至儀真議從陸諸官心知不可而憚於以身任江行之險悒悒不敢出語公獨力爭之極言沿江山險路不可通狀且奉玉體馳峻坂上下撼頓萬一聖情聞之悲惻奈何議論往返數日而諸大臣亦密遣人探沿江路

果險如公言乃決從江之議以鐵絙維舟行如期至承
天遂如期以葬沿江千里居人免於伐樹發屋役夫數
萬人得無走死山谷中公於是有力焉及為刑部尚書
轉戶部益能於其官乙巳致仕歸武進歸年餘而病卒
年七十有四公性喜讀書雖裨官小吏亦用以資其經
略尤喜為詩歌羽檄倥偬中率不廢詩上谷榆陽稿皆
成帙也善字書有晉人風骨其罷宣府家居好獎進後
輩與人言娓娓不厭與士人言言讀書與俗人言言勤

業莫不取其有益是時余以諸生候公公過待以為國
器及入仕途公每遺書誨以經世之學顧樗散無能自
效於公者公且死以傳文見屬余不得辭也公平生儉
樸既已貴其自奉如居約時獨祀先歛客則極豐潔曰
賓客重事也年五十遂獨居未嘗畜媵妾教諸子愛而
有法一飲食必有訓自公既沒天子賜之葬祭贈公太
子太保謚曰襄敏嗚呼可謂有始有終者矣妻夫人吳
氏子二人仕為都督府都事偉太學生皆好禮讓能世

公之家者也

暘谷吳公傳

公名傑字士奇武進人也其為醫始公之高祖肇父寧
贈太醫院判公之學自青烏氏書風角雲氣占經李虛
中子平之術金丹內外秘訣無所不通醫特其一技耳
然竟以醫至大官其於醫精究古方書而善脉其治病
不純主古方書而一切以脉消息之有初若與証相反
而卒無不効者其餘奇疾尤効也弘治間以名醫徵至

京師遂以醫游諸公卿間公醫既精而儀觀磊落濶達
善談說穎然見鋒鏑於是諸公卿爭迎致為上客京師
諸老醫與公同時所徵諸郡國醫莫不望風下之是時
都御史王鉞鎮大同奏乞吳某調治邊軍未及行御史
顏頤壽給事中李良度皆奏言吳某宜在供奉不宜棄
之邊地下禮部禮部尚書集所徵郡國醫試之卒無踰
公者故事高等入御藥房中等入院最下遣還郡而當
遣者若干人公為之請曰國家三四十年纔一徵醫耳

若等幸被徵又待次都下十餘年而又遣還誠流落可
憫願不入御藥房而與若等同入院尚書義而許之正
德幾年掌院事李宗周竟薦公入御藥房而同薦者凡
八人有與宗周同官爭權者因左右讒之上曰宗周所
薦多私人且通賄實不能醫上曰吾當自試之時上病
喉痺遂按名召公一藥而愈上喜甚嘆曰有醫若此乃
不以醫朕耶因厚賜公詰責讒者而謂宗周為忠公自
是得幸於上上每病未嘗不屬公公治之未嘗不立愈

一日上獵射還憊甚感血疾公進犀角湯愈命進一官
賜彪虎衣一嘗幸虎圈虎騰而驚公療之愈命進一官
賜銀五十兩表裏一頃之試馬御馬監腹卒痛公進理
中湯立愈賜繡春刀一銀三十兩自是上所游幸公必
從嘗侍上臥至以肩倚上或撫摩玉體有不以屬左右
近幸而以屬公其分御膳啖公有左右近幸所不能得
而公得之自醫士十日而遷御醫自御醫三月而遷院
判凡一愈病則一遷為院判當遷者數矣公固讓三年

而遷院使上親寵益篤嘗欲以禁衛銜公賜蟒衣公謝
曰臣以藥囊侍陛下此非臣職也上乃止某年上南巡
公以醫諫且泣曰聖體尚未安不宜遠行上怒曰汝醫
官也敢乎叱左右掖出公留京師駕行至淮漁於清江
浦遂病還臨清夢見公急遣校尉召公公馳至臨清見
上上泣曰爾不憶我耶公亦泣遂扈從還通州時權彬
握兵在左右見上病一旦不諱懼誅欲據穴窟為亂力
請復幸宣府公脉已驚甚密言諸大奄曰疾亟矣幸可

及還內耳脫至宣府不諱吾與若輩即死寧有葬地乎
奄以為然乘間百方說上上意動而彬亦數從公覘問
上病何如即詭言曰且愈矣勿憂也已而駕還京師崩
彬坐誅毅皇崩之幾月而公亦致仕去矣既致仕留居
京師遣其二子徧從韓林諸名公游壬辰子希孟舉進
士以才廉擢給事中於是以恩進公階朝列大夫甲午
子希曾舉於鄉自某年公還武進稍葺室廬治田園為
終焉之計公既老居鄉不復為人治病而親戚故人有

奇証或病危甚衆醫所不治者乃以請公公亦間往往則應手愈居閒誦老莊氏書益究金丹內外秘訣以冀所謂長生者其自號暘谷谷者谷神也或曰暘谷海東仙人所居歲時與里中故人雅歌彈碁飲酒為樂酒酣數語及毅皇時事出所賜衣物未嘗不泫然流涕也久之希孟為廣信知府懇乞致仕歸養歸數月而公卒始公每自詫得丹訣指其小腹謂人曰此中有物矣先卒之一日余往候公公紫色瑩然如平生希孟曰唐翰林

在公點頭卒時神氣不亂整衣端坐口云好好遂卒年七十有八嗟乎公信多奇矣哉希孟居鄉有志嚮師事徐養齋先生而友余余是以得備聞公之行事為傳而敘公在毅皇時事獨詳焉以見公之遭遇以俟國史傳技者有考云

萬古齋公傳

宜興萬氏相傳徙自鳳陽始徙者曰勝三傳至雄雄兄弟六人皆強力殖產結豪傑而萬氏始大於邑中雄生

政政有弟盛為九江推官以學行推高一時而萬氏於是為文獻家政生璵璵生公諱吉字克修為人方嚴剛峻可望而知其為莊士自少從盛學盛為人亦方嚴公心效慕之盛亦喜公類已公為學以為非有廉隅牆壁不能自植立於是斂束筋骨刻意以古人為師讀書觀古人忠孝大節輒揭之壁間自恐不如平生自禮義廉耻大界限至於拱揖進趨冠履食飲之節畫線而蹈終始相較不失毫髮善戲之謔露齒之笑未嘗一出於口撥

衣蹶足箕踞跛倚之小過未嘗一加乎身其事父母視
寢視膳視藥恪有儀節深心歎然父母病不解帶自始
病竟病愈以為常父暴病一夕卒每痛不及藥哭輒殞
絕病阨然骨立年五十餘遭母喪哀毀不哀於喪父時
以是病衄至沒齒衄竟不愈也與弟善以友愛聞邑中
病則共被寢至老彌篤尤未嘗異錢帛善亦謹厚有兄
風教諸子寬而有法先志行而後文藝諸子烝烝雅飭
規行矩步孝謹一如公不哀其閨門化之娣姒雍睦自

姻族朋友出入公家者不聞有諄語嘻嘻之聲其諸子弟不聞有挑達宕佚華矜之習邑人爭相高之以比於漢石氏而以公比萬石君公面目清冷對人少寒溫語若落落寡情然人久與之處真意溢出外有邊幅而內朴無城府至其情所甚鍾處宗族姻戚間恩禮款曲即素婉孌多兒女子情者不能及也其自奉泊然衣未嘗問新敝食未嘗問精惡室無媵妾館無圖畫古器伎藝之玩賓至時一奕而已然亦未嘗溺意求工也居家手

不識握算計帳之具口不問錢米盈縮雖以有弟足藉亦其素性於財利疏濶使然然獨喜施舍至歉歲家人節口而食遇窶人未嘗忘施也友人且死屬其妻曰濟我後事者必某也已而果然其處宗族每誦范希文自吾祖宗視之無親疎之語嘆息者久之族人有緩急既自罄其貲與力其所不及則醵其閭族之貲與力以濟其三族中待公飽饑衣凍婚子嫁女者若干人公恂恂儒生非欲以振急排難為豪舉其平生壙坎又非如希

文有俸廩賜予可以收族其所為如是蓋天性也以繩檢自律亦以繩檢律人人有善雖在後輩必稱嘆推引以為賢於己人有過雖在同輩必面折或動色不少避於義有違雖田夫野人女子之言皆為之屈服及引義爭是非雖遇達官勢人鯁鯁反復必伸已說不少妍媸以是人或謂公激而知公者益以公樸直愛人如愛己也其有欲為不義懼公知之而止者較之面折者尤多居學中三十餘年學成行尊其儒生後輩有志節者雖

不及公門亦心師公事公一如事師之禮公亦款款訓諭相勵以古道不降辭色既執古自信因以古名其齋諸儒生無背面必曰古齋先生而不敢字之其家子弟且冠必為之行古冠禮及婚葬祭率準家禮從事不為苟簡在學中凡八試於有司皆不第而提學林公有孚蕭公鳴鳳以德行旌士每首公以風諸儒生公自少讀經史守儒先成說甚謹於儒先中尤篤信晦翁氏然至疑難處輒掩卷自思及有所得多出儒先論斷之外文

字尚理致不為華言然諸儒生心服公之行故不以文
名在學中獨與潘君松為厚交潘君疎爽坦易而公堅
苦縝密兩人操行不同而各以所長相取至白首無間
嘉靖丙申余始識公於宜興公因遣二子從余游數過
余相與講論有合有不合而卒歸於相得也蓋公尊經
傳甚篤而守格式甚謹然而默成不言之旨近於破去
經傳而易以為束書游談者之所便得心忘象之宗近
於脫落格式而易以為宕無忌憚者之所假故儒者往往

因其似而疑其真余既與公交久之乃稍稍於經傳格式之外有所陳述大要以反求自得一不蹈襲獨操櫟柄為說公聞而相與辯析亦久之然公察余非敢不尊經傳非敢不謹格式者是以因其跡而諒乎其心知其人之不求為異而意其言之或不妄也先是公之友周君道通學於王陽明子得聞致良知之說歸而以語公力懲患之公以其說異朱子不肯信道通沒十餘年既與余相得則慨然謂其所善門人王革曰道通愛我今

荆川子語固多與道通所述相合然固未嘗背於朱子
我恨不及道通之存也嗚呼以公之堅志勵行虛心從
善使其早歲有聞且將由忠信而好學不知其何所止
正使晚年所遇不至如余之迂駑而得一豪傑之士其
感孚契合灑然冰解又不知何如此余所以愧公之知
也然公之所自立者其亦足以見於世矣居久之以貢
為桐廬訓導桐廬地磽陲儒生溺於習俗錐刀瑣瑣鮮
志操公夙夜勸課為之深明義理界限時時舉釣臺故

事激發之曰若輩非子陵鄉人耶諸生一時為之爽爽
心動時節或有饋遺却弗受間有所受則以振業諸生
之貧者提學張君岳考之曰文足以範士行足以勵俗
近得其實云未幾懇乞致仕歸是時二子士亨士和舉
進士公每遺書必曰願若輩為好人不願若輩為好官
士和以翰林吉士出為禮部主事公聞之喜以其能不
干進如教指也在桐廬二年而歸歸六年而病卒病且
亟余往候之氣已微矣猶披衣端坐作拱揖狀謂余曰

吾語言若顛倒者余曰須靜以養之公曰正為平日不能養耳是卒之前七日也卒時為嘉靖甲辰七月二十日年六十有三公蚤年剛方自立晚而氣象和易對人煦煦自桐廬歸後輩益樂親之其行已類狷而意甚廣居常有志天下事自為諸生地方利害休戚疊疊為上官陳說既老無所施用然猶不忘時事聞一賢人進則喜見鬚眉為天下賀或聞進一庸惡陋劣者則憾然改容當食為之廢飭每得忠諫章疏雖老必手錄卒之前

一月既已病半起坐間猶類聚平生所錄拱手讀之其強於好善至老益篤自桐廬歸數入郡訪余相與講劇益切又邀余訪養齋徐公慨然相見晚也故其卒也養齋公誌其墓妻李氏封安人子三人士亨吏部員外郎後公五月而死於毀士安縣學生士和禮部主事孝謹一如公者也

李宜人傳

余讀同年友羅君洪先所為述其先人副使雙泉公與

李宜人行事為之慨然而嘆蓋嘆吏之漬於墨而潰其
防也然而潔志好修之士不宜如是其少豈亦有所累
焉而不能自免歟且夫陰柔之性嗇而耽於飾牀第之
言昵而易以售向非剛士孰能自免於此即有能免於
此而或窺罅揣空乘其耳目所不覺而陰入之賂幸而
覺之又牽於愛而有濡滯不忍之心往往壞名而失志
以至於敗可憐也已故內有采蘋之節則外有素絲之
風內有交徧之謫則外有終窶之怨言所自者微也雙

泉公固潔志好修剛而不惑者而宜人之助蓋亦多焉
雙泉始以諸生游學於白河雙泉產故窶而旅中益無
以為資宜人匍匐憔悴以佐朝夕之急然此猶迫於無
可柰何至如雙泉舉進士由兵曹郎歷鎮江淮安兩郡
守官尊而俸入多人謂宜人有遭矣而此兩郡又夾江
淮之衝魚鹽米穀重裝大賈之輳多見可欲以是吏於
茲者潔志好修之士尤少而肥家以去者為多與所謂
窺罅而陰入之賂者亦時時有焉故為吏人妻者不饜

於肥家之公橐則饜於窺罅之私賂矣雙泉為此兩郡
守其所入既不足以肥其妻子而宜人亦小心奉約束
惟謹其苦楚澹泊如在白河時至雙泉解官歸宜人篋
中皆故貧時物也無一增者雙泉為兵曹郎是時奄瑾
張甚雙泉以奉法數忤瑾瑾銜之數使人伺雙泉雙泉
於是日夜留曹中治文書不敢歸而宜人獨擁戶爨馬
矢買魚肉以餉雙泉而自與諸女奴食脫粟或雜以稷
菽有旬日食不肉者瑾伺之數月亦竟無所得及雙泉

在鎮江宜人攜女奴日往後圃掘野蔬而食之雙泉既廉不受錢又往往割俸錢以資過客宜人不謂迂也宜人於是凡再受封矣至無錢買冠帔而嘗從諸寮婦飲諸寮婦皆冠珠翠冠明璫錦袿釧金纍然宜人既素不具冠又獨衣故貧時衣以往逡巡席間諸寮婦以為苦也更密勸以賂宜人矍然曰若不知吾夫耶且吾安得聞此言諸寮婦因竊嘆笑已而女驢有私獻金器飾者蓋乘雙泉所不覺也宜人痛呵絕之曰若不知吾夫耶

諸寮婦至是始赧然以賂為耻焉嗚呼使為吏人妻者
盡如宜人則安有所謂牀第之言與窺罅以敗其夫者
即有然者使其盡得見宜人之事安知不有赧然耻如
諸寮婦者乎此余之所深歎也宜人故長史李勲之女
歸雙泉若干年以卒有子一人而妾所生子二人其女
二人則皆出於妾宜人子獨洪先耳宜人均而字之尤
善處嫡妾之間兩妾中其少者柔婉自媚於宜人宜人
愛而撫之其長者故窘宜人然弗為較也第拊心自泣

而已亦不以言於雙泉後雙泉自知而欲督過之宜人
曲為救解乃已其或雙泉自以他事督過此兩人宜人
曲為救解乃已此在宜人不為奇然亦人所難者宜人
既卒洪先以書屬余使為之傳余於交游中雅慕洪先
洪先凝重醇慤其志必欲為古人而後止可以觀雙泉
與宜人之教也而宜人之事有足係世風者故余掇其
一二者著於篇而又以志余之所感云

章孺人傳

呂氏有賢母曰章孺人孺人讀書解道理有女士之行
孺人之知書也自其父省菴翁翁先世累有顯人家故
多書而翁尤好書日誦及六千字為準日誦不及六千
字不寢於書尤好誦五經自漢以來諸家之說五經者
皆能通之為文博雅尤工騷選然冲澹不好仕進以布
衣終翁無子而有女一人孺人也自幼受句讀於翁翁
以為能既乃稍進孝經論語大學及史傳所載列女賢
人孝弟之事種種能識其大指翁乃慨然而嘆曰惜乎

使汝不為男子章氏文獻當在汝矣蓋既以喜孺人又若自恚其無子可屬然者孺人既歸於呂其夫為芝山君某芝山有祖母章與母趙母張皆在而芝山兄弟數人諸姒婦比屋居孺人奉一祖姑事兩姑處諸姒能一不失其歡祖姑章者孺人同族亦謂為從祖姑者也年高性嚴諸子孫婦莫能揣意嚮顧意獨在孺人然非以重親故也諸姒數因孺人進飲食問起居章即喜有賓祭宴饋之事章必以命孺人孺人唯唯受命然不敢專

必以請於兩姑退又謀之諸妣以故諸妣款款益和兩姑亦喜吾婦之能代事吾姑而章又益悅也孺人與諸妣居款款益和然慎重寡言笑即有內事相關涉數語而已或問及諸史輒以不能對以為非婦人事也惟見芝山夜讀史間舉省菴所評史一二語以問于是芝山乃知孺人之嘗讀史也至於訓授諸子書則縷縷竟朝夕其語有外傳所不能詳者孺人之生子洵也後洵既生而不娠者又七年洵又多病力請為芝山納妾妾始

娠孺人緝衣絮具湯沐親自舉兒兒死涕泣累日夜是年而孺人自有娠明年演生又明年泌生而洵病亦愈孺人之生洵與演泌也後洵又病恒愛而憐之然厘厘不為姑息居常啖兒糈果勿與梁肉即與皆大人餒羞之餘未嘗為兒烹一雛其所與襦袴皆澣衣為之不為製一新繒常曰兒福薄豈勝美衣肉食耶至於割鮮烹焯之地與里巷謳歌劇戲之事皆閉勿令兒見即隣舍小兒游蕩無狀者戒勿與游狎洵少拂於孺人教旨孺

人視之甚愠然不忍箠撻又不欲聞諸芝山輒自對為之對案不食改之乃喜洵稍長知勤苦與兩弟夜讀書課文夜過半孺人即又慮其勞以病也輒令女奴趣就寢或自起滅其燭常謂洵兄弟曰汝先世賢人之裔也余家先人亦世世讀書宦顯余父雖布衣文學誼行伏一時余婦人也又不幸無兄弟先人之業絕於余父矣兩家文獻在汝豎子可不慎與憶余父且死時汝曹尚幼乃以先人田廬遺其嗣孫而以所藏圖籍文書畀汝

父且謂余曰他日汝子可教教之讀吾書吾死不恨矣
汝兄弟志之及洵為諸生嘗就舉弗第孺人慰之曰汝
年少學未成爾且余與汝父教汝書固不願汝祿養也
汝能積學修行縱終身不遇如余父可也不然徒苟且
富貴即鍾鳴鼎食亦何足道於是洵強學博問以儒有
聞而章氏之書乃大行洵居官凜凜有名節其志師古
人務究於精微而止蓋皆自孺人發之余觀前史女子
能讀父之書者率載以為美談至於有家之傳則往往

以託遺書為重事是以重於有子而伏姬班姬之屬雖能讀父書然終不足以世兩家詩書之澤者其竟以女子故耶孺人奉其父之遺書與其遺言以教而成其子子洵強學飭行傑然以儒自見於世人且望而慕之曰是得於章氏之書者為多是使章翁無子而有子其書無傳而有傳也蓋人知孺人之為賢母而不知乃其所以為孝也余故為之傳以著之孺人諱寶浙之新昌人子三人光洵光演光泌光洵舉進士今為御史

俞孺人傳

俞儒人者玉山詹君諱某之妻訓導鈿之母也鈿生而孤時孺人年二十有五歲鈿伯兄某始三歲孺人居孀矢節至今凡若干年卒以植二子而觀其成自二子幼學於塾每夜歸讀書輒篝燈火紡績與相對以為常被服食飲令母得擇所欲母得詈人出惡語言有過輒請於其舅而呵責之一不為掩故鈿自童孺時已恂恂若老生後舅氏沒而二子且長矣則使某業農以給而使

鈿專業於儒又縱鈿使日與邑之諸雋游處鈿痛自感奮日夜刮淬在諸生中數年以學行推擇超等為貢士鈿居京師是時四方修行之士若鈿之同郡徐子直成都趙孟靜輩相與羣居講學鈿悅而從焉恐不得卒聞然世方驚於功利雖薦紳儒生皆不喜若輩說或相指笑以迂濶孺人詢知其子之所與游者某人某人而又詢知其所與游某人某人者如何人也乃獨心喜焉鈿為人愿而善藏其居衆中退然不見辭色而其介然有

所不為既訓導於常亦閭閻不自標幟時或舉其所聞於先生長者一兩端為諸生論說諸生相與服其行而信其言孺人以鈿之能惠於諸士也則又益喜鈿為訓導幾年諸生某某輩本其教之所自也相率請余為孺人傳余既傳其事而論之曰夫女子非立節之難而立孤之難然世所稱立孤者謂其不墜門戶或能以榮進顯云耳非有能教之以正而成之者也就有能教之以正者顧其為教也止於其母之身其教之所及也止于

其子之身而足矣今孺人乃能使其子盡友四方之賢
人君子以助乎其教之所不及又能使其子以身為諸
士師以廣乎其教之所及蓋其所以風世而軌物者遠
矣噫嘻此豈婦人女子之所幾也哉

葛母傳

葛母李姓諱妙賢鳳陽李翁諱泰之女同邑葛翁容菴
諱欽之妻貢士澗之母容菴翁豪雋有氣槩游於商賈
中能自見其奇嘗上書巡撫言鹽法河渠事利害甚具

語在王文恪公所為傳始容菴之賈於揚也母獨家居奉其舅姑服勤幹蠱兼子與婦之役容菴是以無遠賈之憂而舅姑亦忘其子之不在膝也其故廬災於火容菴自揚輦石輸木而經理匠事皆屬之母其居之成也至今族人聚而居之已而從容菴徙於揚則又助容菴構新居其經理視鳳陽時尤勤不踰時而寢堂言言遂如故家至今子姓聚而居之母家於揚幾十餘年揚之俗皆窳浮麗男子游手末作其婦女鮮事織績而習為

假髻侈袖緣履之飾母獨織於治生蚤起育雛食豕釀酒造醢翦裳滌器染纁凍縹僕僕追燭不自休至見美麗服器飾輒閉目斥去以是能殖其家不獨容菴居積貲遷之故也母雖以織治產至於振里族之乏繕橋甃衢粥餓樁齒縱解簪珥亦無所嗇容菴慷慨行義傾貲結賓客蓋不獨容菴之能施也女夫死無子命子澗為之立後其父母死無子又無可後者則以義立主奉之別室而烝嘗之其知大計往往若此母性凝重訓御諸

婦諸女如師門內無嘻嘻聲尤謹嫡庶主僕之分僮婢三百餘指飽饑逸勞人人自以為得也其教諸子有法尤屬意澗澗好聚古書購書數百金以上澗能為古文辭所交多四方名士館穀饋遺諸費日出毋恣之勿問也曰吾夫積金使吾子易以為善今吾散金以成吾子之善也不亦可乎已而聞湛甘泉先生講道南廡則遣澗往澗於是聞體認天理之說未幾構甘泉書院於揚費且數百金澗請於母母曰此義事也亟圖之自是書

院成而揚之士彬彬多嚮方者母年七十有五而卒其
詳載在太僕盛公所為狀而盛公又題其旌曰賢貞蓋
不誣云母五子澗洞澄江漢而澗最知名余亦知澗者
於是澗以傳屬余蓋余讀鄒東郭先生所為母阡表太
息者久之以謂伊洛先生在當時彼號為衣冠士子羣
咻衆信乃不及一女子又謂葛母可方尹氏之母其說
云然然余以謂尹母之所以能彰於世者惇則貽之也
伊洛之門其穎敏才辯者幾何人而確實堅苦言行必

信能守師法則焯為第一是真能以善養者而母之訓益因以彰澗所聞於師者固伊洛語也澗也自是焉益落其華而收其實習其傳而反諸心求其所以為焯者則所以使其母之有傳者固無待於人而惟盡乎已而其所以盡乎已者固不在於聲華辭藝之蔚然者而有在於克己反躬之間然者矣故因東郭之論而附著之

荆川集卷十一

欽定四庫全書

荆川集卷十二

明 唐順之 撰

雜著

讀春秋

春秋王道也天下無二尊是王道也禮樂征伐會盟朝聘生殺之權一出於天子而無有一人之敢衡行無有一人之敢作好惡作威福是王道也是故太宗伯以賓

禮親邦國而以間會發四方之志天子巡守諸侯既朝則設方明而盟是會盟者天子之權也其或不出於天子而私會私盟者罪也故春秋凡書會書盟者皆罪之諸侯朝於天子而諸侯之自相與也有聘禮無朝禮凡其不朝於天子而私相朝者罪也故凡春秋之書如書朝者皆以罪其朝者與其受朝者九伐之法掌於司馬而天子賜諸侯弓矢斧鉞然後得顯征伐雖其顯之亦必其臨時請命於天子而後行是侵伐者天子之權也

其不出於天子而私侵私伐者罪也故凡春秋之書侵
書伐者皆罪之諸侯之大夫公子雖其有罪必請於天
子而後刑殺焉其不請於天子而顓殺者罪也故凡春
秋書殺大夫殺公子者皆罪之夫侵伐有貪兵有憤兵
有應兵有討不睦有以藩國侵王朝有以王朝征藩國
有以王臣借藩國而戕王朝者故戰有彼善於此者要
之無義戰盟會有解讎有固黨有同欲相求有同力相
援有同患相恤有以吳楚受盟有以吳楚主盟者故會

盟有彼善於此者而要之無義會義盟殺大夫有誅叛
有討貳有懷諫有借以說於大國有為強臣去其所忌
故殺大夫有彼善於此者而要之無義殺是故春秋自于
稷澶淵兩會之外並不書其故而至於盟會侵伐則絕
無一書其故者非略也以為其會其盟其侵其伐其戰
既足以著其罪矣不必問其故也殺大夫必名亦有不
名而但書其官如宋人殺其大夫司馬者亦有併其官
不書如曹殺其大夫者此非略也以為義繫乎其殺之

者而不繫乎其殺者義繫乎其殺之者則其殺也足以著其罪矣義不繫乎其殺者則不必問其為何人與其為有罪無罪焉可也說春秋者不達其意而瑣為之說曰其會也以某故殺某大夫也以某故至於盟戰侵伐亦然是皆無益於春秋也而徒為蛇足之畫者夫春秋經世之書也其經世也以正亂賊也易曰臣弑其君子弑其父非一朝一夕矣不早辨也說春秋者亦云人臣無將夫人臣而竊其君侵伐會盟刑殺之權其為將也

甚矣人臣竊其君侵伐會盟刑殺之權而久假焉而莫之歸也其為漸也甚矣故臣子至於推刀於其君父而春秋書其國弑其君某某人弑其君某者是弑之成也是春秋之所痛也人臣而竊其君會盟侵伐刑殺之權是弑之漸也將也是春秋之所辨也孔子嘗自言之矣曰天下有道則禮樂征伐自天子出天下無道則禮樂征伐自諸侯出無道而至於自大夫出無道而至於陪臣執國命嗚呼是春秋之勢也挈其漏於陪臣大夫者

而還之諸侯挈其漏於諸侯者而還之天子是春秋之
撥其亂而反之正也夫周自東遷以前雖王室已不競
矣而其權固在也幽弒而平徙岐豐之地委為草莽渥
洛之外聲教阻絕于是尾大之勢成而諸侯橫變易禮
樂馮衆暴寡大小相朝強弱相劫無一不出於諸侯者
而天子曾不得尺寸之權矣蓋周之盛王道行頌聲作
而其可見者莫如詩雅蓼蕭湛露是諸侯之會同於天
子者也彤弓是諸侯聽征伐之命於天子者也出車采

微是天子之自為征伐而四海不敢侵叛者也故曰詩
亡而春秋作詩未亡天子之權存詩亡天子之權喪春
秋收既喪之權而還之天子者也春秋所以接詩亡之
後雖一日不得緩也文宣而下則諸侯又不能自執其
權而大夫之交政於中國者攘攘矣三桓六卿七穆孫
甯魚華陳鮑擁兵樹黨而主勢孤矣葬原仲而私交始
矣作三軍舍中軍而魯之權罄於大夫矣盟溴梁盟宋
而天下之權罄於大夫矣衍出奔孫陽州孫越入彭城

入朝歌入晉陽而大夫之為禍烈矣蓋天下之勢愈下而春秋之治之也愈詳桓僖以前列國之大夫惟特使而與魯接者則名之而會盟侵伐則大夫未有以名見者夫救徐大夫特將也翟泉大夫特盟也春秋第曰人曰大夫而已不以名見也若此者非略也以為不繫大夫也文宣而下侵伐會盟大夫未有不以名見者雖溴梁之會其君在也而大夫盟書雞澤之盟君既盟也而大夫盟書若此者非煩也以為繫乎大夫也不繫乎大

夫雖夷吾隰朋狐偃趙衰之勲且賢未嘗以名見焉繫乎大夫雖劣如欒黶荀偃高厚華閱則瑣瑣以名見焉不繫乎大夫雖其君不在而大夫特盟則亦弗詳焉翟泉是矣繫乎大夫雖其君在而大夫綴盟則亦詳焉溴梁雞澤是矣不繫乎大夫雖主帥亦略而人之桓僖以前侵伐書人者是矣繫乎大夫雖偏裨亦牽連而名之鞍之戰是矣其弗詳大夫者以專治諸侯之為亂賊也其詳大夫者以併治大夫之為亂賊也說春秋者不達

其義而曰人大夫貶也夫書人為貶彼廩閱之徒以名
見者乃為褒也耶惟曹薛滕許之大夫始終書人說春
秋者曰小國無大夫非也夫此數君者且為人役之不
暇而未嘗敢執天下之權也而況其大夫乎蓋不繫乎
其大夫是以終始人之而弗詳今日書人為貶則曰齊
晉諸大國之大夫偏受褒而曹薛滕許之大夫偏受貶
耶侯犯南蒯弗徂陽虎之徒出則大夫又不能自執其
權而陪臣實執之矣墮郈書墮費書圍成弗克書竊寶

王大弓書得寶玉大弓書而春秋之正陪臣者又詳矣
故孔子欲往公山佛肝之召而曰吾為東周云者即春
秋書墮費墮郈意也是春秋之終也或曰盟葵邱盟踐
土師於召陵城濮說春秋者以為聖人予之也今亦曰
是禮樂征伐自諸侯出也而奪焉可乎曰是不然矣桓
文之未出也權雖不在天子而諸侯亦未能盡得天子
之權也蓋其權散桓文之既出也則權既不在天子又
不在他諸侯而桓文獨盡得天子權也蓋其權聚譬之

主人有千金焉而竊之者十人雖金已不在主人矣然
十人而人得百金焉尚未足以當主人也而竊之者一
人苟一人而併千金焉則是疑於主人也權之散臣悖
於主權之聚臣疑於主故較利害則權之散而交鬪猶
不若權之聚而可以紓禍息民語王道則權之聚而疑
主猶不若權之散而未有所屬隨之屯曰隨有獲人隨
而我獲之未害也而謂之凶豫之坤曰由豫由我致豫
未害也而六五以為貞疾故桓文者臣之凶而主之所

以負疾者也且桓文以前諸侯固有相朝者則亦一二小邦而已猶未有六服羣然相朝者固有私盟會擅侵伐者則亦一國兩國相讎相結而已未有舉中國而聽於一人未有十餘國而共攻一國者是天子之權未有所屬也桓文之興五年一朝三年一聘而諸侯之玉帛相率而走於其庭天子黼黻之前乃不得一人秉圭而北面者彼齊晉亦偃然受諸侯之朝已而終其身未嘗一涉天子之庭也衣裳之會兵車之會未嘗有一介請

於天子也是故糾合諸侯同獎王室未有如葵邱踐土者諸侯之羣然役屬臣僕於諸侯亦未有如葵邱踐土之甚者荆蠻攘斥中夏又安未有如召陵城濮者而樓諸侯以伐諸侯亦未有如召陵城濮之甚者說春秋者不達其意而曰會於某盟於某是聖人以諸侯授之齊晉也夫王室之不競也諸侯既已盡折而入於齊晉矣聖人不能挈而還之天子也其又推而授之以益其逼也耶夫權自諸侯出不問其如何而均謂之無道敵國

相征不問其如何而均謂之無義不知禮樂征伐之出於桓文也其為道耶其為無道耶桓文之戰其為義耶其為無義耶使桓文而誠於勤王誠於禦敵急病而其柄則倒持也其分則上陵也聖人猶必律之以法而桓文且將為法受惡矣況其借名勤王而實則自殖陽為急病而陰欲養亂哉滅譚滅遂本以自肥孰曹畀宋為譎已甚桓之末年侈然有封禪革命之心而文至於請隧以葬此其去問鼎者無幾耳又何以責楚也然則聖

人所稱民受賜一匡而仁之何也曰是聖人之顓論功也而春秋者顓以明道也穀梁氏曰仁不勝道存王室也然則說春秋者曰謹華夷之辨何也曰此誅亂賊之一也夫春秋之所夷者吳與楚楚之先鬻熊為姬文師國於江漢之間而太伯端委以臨吳蓋皆神明之胄矣荆人不道問周之亂革子以王叢毒上國吳亦相效而王是亂賊之尤也是以春秋從而夷之春秋諸侯中其顯然為逆者莫如楚吳其陰逆而陽順者莫如齊晉如

斷獄之家吳楚則功意俱惡齊晉則功遂意惡功意俱惡故聖人顯誅之顯誅之故其辭直如卒不書葬君臣同詞之類凡皆直辭也功遂意惡故聖人陰奪之陰奪之故其詞微如邢遷於儀夷城楚邱狩河陽之類凡皆微辭也夫小雅未廢而四夷不敢交侵小雅盡廢而後四夷交侵春秋始書荆入蔡以獻舞歸則其跋扈之勢已見桓文奮而扼之其鋒稍阻文也沒而晉霸衰而楚人之圖北方者遂日長而不可制是故春秋書荆入蔡

此霸之未興而楚猾中國之始春秋書次于厥貉此霸之既衰而楚窺中國之始蓋桓文之所以扼楚者其力有難易而楚與中國之所以盛衰其幾有倚伏桓起於海濱而所從者宋衛陳蔡皆弱國故謀之十餘年結江結黃連十二國之師而後能服楚於召陵文據表裏山河之固而所從者齊秦皆勁國故反國一年僅連三國之師而遂能克楚於城濮一戰而殺其專兵之將然晉之克楚也得策於結秦而晉之不競於楚也失策於讐

秦自殺之役而秦晉相讐殺者歷四五世戰彭衙戰令狐戰河曲積十餘戰而不解是晉人自失一強援自生一強敵失一強援則其氣力不完強敵伺近則其勢不暇於略遠故晉霸之衰而楚益橫者殺之役實然說春秋者乃曰殺之役春秋許晉襄繼霸吾不知也夫楚莊者又蠻酋之雄耳而遠交秦巴近攻陳鄭則是晉之讐秦非特生一強敵乃又借盜以兵也春秋書楚人秦人巴人滅庸而楚之謀益狡矣書楚子圍鄭而中國虎牢之

險淪於夷矣書宋人及楚人平而南北衡矣天下之勢一變也雖然于時諸侯固有附楚者而猶未敢公然附楚也晉雖已不能盡得諸侯而猶未肯甘心以諸侯委之楚也蜀之盟謂之匱盟蓋諸侯猶惴晉人知之也弭兵之說倡而南北之從交見於是中國諸侯公然朝楚向之玉帛於齊晉者盡在楚矣申之會空中國而聽焉齊晉之所連以扼楚者今楚人連之以扼中國矣申之會諸侯獻六王之禮宋之會號之會長楚於晉則是諸

侯甘心為夷役而晉人甘心以諸侯委於夷也天下之勢又一變也至於吳越交兵而夷禍極矣書伐剡入州來會黃池入吳而春秋所以治夷者又詳矣是春秋之終也或曰楚橫而齊晉扼之則是中國果不可無桓文也今日禮樂征伐自諸侯出也而奪焉夫賴人之功以紓患斯人之權以資敵是責鷹鷂之搏而繫其足也不亦迂乎曰不然吾又有以譬之今有僕於此鳩黨鑄兵而主人弗能令也然盜夜入其室則其僕揭兵嘯黨而

逐之以僕為不善也然而足以逐盜以僕為善也然而足以抗主故天下無霸而至於四夷縱橫而莫之禁者非天下之幸也天下有霸而至於臣疑於主而莫之怪者非天下之幸也夫春秋之事齊桓晉文是也齊桓晉文之功定而王道明矣王道明而亂賊懼矣或謂春秋誅亂賊者誅其弑君者也曰若是則春秋所誅者止於弑三十六君之人耳其亦狹矣然則所謂誅亂賊者何也曰治弑也治諸侯之專也治大夫也治陪臣也治蠻

也凡無王者皆亂賊之道也

鴈訓

執徐之歲有鴈集于顧舍人第舍人筮之得小過焉其
繇曰飛鳥遺之音大吉博物先生聞而往賀之至則蹠
華公子在焉公子謂先生曰鄙人聞之人事占幾天事
占符幾罔舛盪而能垢符罔闇沕而弗彰蓋昔者元鳥
集戟黃雀投環游龜像紐墜鵲化印斯瑞耿乎瑣哉然
猶薦紳動色焜焜耀耀若天授幽契而神昇秘寶焉者

矧夫鴈抱陽背陰羽蟲最靈者也迺今歛翮戢翼翩然
來賓斯亦異矣於舍人何所當焉願先生為舍人鋪張
而揚摧之可乎先生曰唯唯可乎哉可乎哉請撫僕所
聞而公子選焉夫陸杜隰黍稷吳粳芬馨狼藉穰穰
滿塋爾乃呼儔命侶啞喋蹂踐一飽恒餘羣啗每饜此
蓋飲食之至樂也舍人嘗羹內褻割肉大官滑脆腥膾
溢腹盈飡若是何如公子曰夫繫稻粱之謀者忘冥冥
之志沈泰養之適者違性命之和老子曰五味令人口

爽願聞其他先生曰文獸眊皮珍禽辨羽爾乃披黼戴
黻純綬雜緇纖毳似鬣溫飀方綈甌肱翎翼翾翾差池
濯冷波以修容颺輕颺而整儀若夫東海獻朱上林呈
白匪恒理之所窺亦云極態而盡飾于是使鸚鵡羞綠
山鷄讓錦此蓋羽儀之至文也舍人綰銀垂黃錯以絺
藻顧步流暉折周展耀若是何如公子曰古之言章服
者特以殊等威別上下而已非以為侈榮極觀也且今
聞被躬安事文繡哉先生曰鬱堊茂林平皋廣澤爵羅

無所安施矰繳爾迺頡之頡之翔而後集輟雲霄之勁
翰指天地以假息故易著漸磐詩詠遵渚豈比夫鸛鳩
蹠踰乎榆枋鷓鴣卑棲于簾廡者哉此蓋居處之至適
也舍人待詔石渠之庭侍直承明之闥栖遲雲陛偃仰
華輦若是何如公子曰儒者以禮義為安居未聞文軒
夏屋之為快也且夫東方朔陸沈金馬奚足道哉先生
曰神韻作書實始鳥跡而鴈以字稱焉觀其隊矯朋黨
翕跂糾紛一從一橫乍合乍分既錯落而成點亦聯綴

而為畫拂素霓以施鉛依玄霜以和墨於是掩蚪蚪之
奇形奪蝸蛇之巧篆此蓋法象之至章也舍人搦碧玉
之管操文犀之觚斯籀是摹鍾王為徒若是何如公子
曰書者六藝之一耳且夫餘墨成池敝韻成塚固已勤
矣無迺非古人所游藝者哉先生曰秋空沆瀣金波皎
晶川原竄窳百籟收聲爾迺揚吭鼓頰載飛載鳴啁哳
嗑嗒嘹唳呶呶或赴羣而響駛或候侶而聲遲或雙呼
而離離或單噉而悽悽或中斷而更續比律呂之相諧

于是鸛鶴為之罷唳，鴉鵂為之噤舌。羈旅聞之而遐思，
離妻聞之而於邑。此蓋聲音之至極也。舍人擅中吳之
逸韻，汎下里之煩吟，攤篇捋句，錡玉鏘金。若是何如？公
子曰：歌賦尚矣，然雕蟲篆刻，哲人刺焉。願先生少益其
說也。先生曰：積石草腓，交河凍合。蛾蟻層冰，皚皚疊雪。
爾迺審圓方之闔闢，謝坎維而向離。服匪垂翅于寒門，
爰晞羽于暘谷。異往來于元鳥，類屈伸于尺蠖。此蓋消
息之大時也。舍人始焉豹隱吳門，迺今邁休際昌。連茹

景征以應鴻漸豈徒曰好爵是嬰若是何如公子迺俛
首深思而未荅也先生遂推而進之曰夫鴈有六德焉
知時寒燠智也時去時來若有約劑而不爽者信也銜
蘆以避戈慎也締偶不亂者介也能羣者仁也羣而有
序者禮也舍人脩姱葆真襲華振若畜茲六德協于禎
祥若是何如公子乃雀躍而起喟然而嘆曰嘻吁休哉
夫晰萬物之情者不以通塞異觀究天人之際者不以
幻化眩見故履幾莫如謙謙承符莫如兢兢謙謙者人益

之兢兢者天庇之然則來鴈之為瑞也蓋亦主人之自求多福哉詎不閑哉彼諦圖測謀以覲靈者未矣于是舍人再拜謝先生先生乃去

書岳將軍題大營驛

莊子以子之於父為命之不可解以臣之於君為義之無所逃意若以君臣為強合予嘗疑其不然觀岳侯所題大營驛壁其處心積慮未嘗一日不在於復中原迎二帝眷眷然若赤子之於慈母然此豈無所逃而為之

其亦有所不可解者乎侯之言曰君臣大倫根於天性此侯之所以自狀而吾之所謂異乎莊生者耶彼高宗者乃忍於忘父臣敵其獨何心且已既已忍於忘父矣有臣焉為之急於其父如侯者亦竟殺之又獨何心嗚呼綱常萬古事也其磨滅與不磨滅只在此心之死與不死而已高宗之為心何如也宜侯之竟以殺身而中原卒不可復二帝卒不可還也大營驛故在水州侯所題字久而湮沒余父為是州乃勒之石而併侯所題廣

德金沙寺勒之蓋侯之心尚炯然在宇宙間未死也固不係乎石之勒不勒雖然使忠臣孝子英雄之士過而讀焉其將慷慨泣下沾襟而繼之以怒髮衝冠者乎

書醫施氏婦事

語曰物反嘗為妖腥穢之氣薰積世界乃有賊殺其大父者及其弟之婦與弟之婦之大父凡殺者三人其兩人即時死婦尚喘息未絕始某殺大父時婦奔呼某怒其呼也追而斷其頸至骨又剖其口婦忍死齧刀賊以

手推刀至齒根骨乃止刀前後所轉其不絕者一線耳
見者莫不憐之亦莫不以為必死會余往無錫知金創
徐君素有神効而婦家貧甚不能請醫余邀徐君謂之
曰君能一往乎徐君激於義舉遂欣然請行曰我不求
一錢必活此婦是我心也因與余俱至則婦勢已亟矣
徐君視之曰無恙也醫三日而腐肉盡新肉生又二日
而口輔上下肉合頸肉起如蓓蕾狀徐君曰生矣始余
迎徐君至時余兩弟及親友劉宗堯左升甫徐子初輩

聞之亦嘉甚曰是吾輩之心也至是徐君告歸諸友請
醵錢為贈不約而合者若干人得銀二兩有奇徐君曰
非吾所為來意也余強之曰固知非君意也雖然願少
抑君之意以成諸君之義可乎徐君乃不能固辭嗟乎
此可以觀人心矣徐君慨然不遠百里而來也其何所
為哉諸君之慨然醵錢以醫婦也其何所為哉方徐君
欲行時其妻適及月產子且徐君坐市肆可計得厚糈
君乃舍其妻之急而徇乎人之妻之急舍其有所利於

市肆之間而奔走其無所利於百里之外亦何心哉鄉鄰之鬪雖聖賢亦謂可以無救而簞食之費雖好名者亦所必惜以必惜之費而投之可以無救之鬪至於不約而響應若有所踴躍而不能已者亦何心哉孟子曰人皆有不忍人之心此其機在乎通與塞耳塞則骨肉胡越通則四海我聞或謂今人之非古人之心吾不信也遂書之以貽徐君而且以風世之好義者則古昔相保相愛相卹相周之俗其亦可以興於今矣

瘞河孺枯骨誌

髑髏完毀凡若干具其髀髁髀髁脊脅諸雜骨無算蓋出乎犬猪烏鳶所饕飽與夫日炙燹燒風銷水嚙之餘而僅有存者自癸卯至乙巳東南荐飢流尸順河而下多於河中之船逮水落不能浮尸尸遂積壘河孺久之維古昔時遇飢饉疾疫則有荒政以聚民其不幸死而暴露則又有掩骼埋胔之令惜哉其不遭乎此時也褚生滔書舍在河孺余與弟正之數往焉每相與散步河

塢之上則見泥滓間圜者如破甌墮者如枯株碎者如沙礫紛然彌望白日照之星星玼玼若尚有光怪余三人者哀其漸滅且盡也命役夫哀而坎焉嗟乎古者葬則旌之以銘旌者別也銘者自名也若曰是其人之骸云耳雖後百千年有得之者亦識之曰是某人之骸云耳古人之于骨骸嚴而別亦不欲其混也若是今乃以五方四裔雜流異業之人而又以殘毀不完之尸爾髣我股甲脊乙脅輳于一坎若聚葦亂蓬然亦重可悲矣

然余嘗見元人發宋諸陵事火其尸以其餘骨雜牛馬骨而埋之今此猶尚人骨也嗟乎彼生時何等人也尚不免與牛馬骨同葬況此輩孳丐之餘猶得以人骨附人骨復何憾焉使髑髏果有知如莊生之說必且一喙于吾言矣坎之以嘉靖戊申春二月是掩骼埋胔之時也

書秦風蒹葭三章後

嘉靖戊申秋七月廿五日夜雷雨大作萬艘震蕩平明

開霽則河水增高四五尺矣余與褚生泛小舫如陳渡
臨流歌嘯渺然有千里江湖之思因詠秦風蒹葭三章
則宛如目前風景而所謂伊人者猶庶幾見之且秦時
風俗不雄心於戈矛戰鬪則瘡技於獫狝射獵至其聲
利所驅雖豪傑亦且側足於寺人媚子之間方以為榮
而不知愧其義士亦且沈酣秦養與君為殉而不可贖
盖靡然矜俠趨勢之甚矣而乃有遺世獨立澹乎埃壒
之外若斯人者豈所謂一國之人皆若狂而此其獨醒

者歟抑亦以秦之不足與而優游肥遁若後來鑿坏羊裘之徒者在當時固已有人歟余獨惜其風可聞而姓名不著不得與鑿坏羊裘並列隱逸傳然鑿坏羊裘之徒以其身而逃之蕙葭伊人者乃并其姓名而逃之此又其所以為至也噫嘻士固有不慕乎當世之榮而亦何心於後世之名也哉因慨然為之一笑遂書以示褚生

書王明齋卷

王君明齋精史韻氏之學博通諸家於易尤多所自得嘗以古文書六十四卦名以還科斗之舊而稍為之訓注使讀者觀於卦名即卦爻之義了然蓋不待觀彖而後思過半也余見而悅之君因書一紙遺余而索余為之草書舊詩於冊用以相報君始以欲學余論易故携所注易自姑蘇來寓天寧僧舍者半閱歲余雖頗竭鄙陋以請於君君所注易與余之說兩人或相印可或不相印可或始不相印可而卒相印可或始卒竟不相印

可然率余得之君者為多而余自知竟不能少裨君也
至於詩歌蓋昔人所謂雕蟲末伎宜為談經者所不道
而草書出東漢芝象以後昌黎氏鄙之以為俗書逞安
媚者也況余於此兩者又素不工哉且夫君以經易教
余余竟授之以雕蟲之技君惠我以科斗頡氏太古之
書而余乃報之以效近俗姿媚之書其不相稱甚矣然
不知君又何所取也漫書以歸之

書丁近齋示孫卷後

丁生輶從予遊出其大父近齋翁家教之語凡二紙其一教之以勤讀書取科第蓋世俗教子弟之常其一教之以決擇於君子小人兩儒之間則固以古道望之而有世間家人語之所不及者矣然翁所教輶以勤讀書寔舉予為况蓋余之少也或然其後年既長大則已知記誦佔畢詞章之習非所以反身而崇德況今益衰且病精力日減於是經年束書不一觀與絕不為文者亦往往有之則是余之壯且老也既已與翁所責輶少時

懶散廢書之狀幾無以異矣其尚足以為輶之所取法而無愧於翁之所稱述者哉然至於君子之儒則未嘗不竊有志焉而願與輶共勉焉其可也

數論三篇

勾股測望論

勾股所謂矩也古人執數寸之矩而日月運行朏朧遲速之變山谿之高深廣遠凡目力所及無不可知蓋不能逃乎數也勾股之法橫為勾縱為股斜為弦勾股求

弦勾股自乘相併為實平方開之得弦勾股求股勾弦
自乘相減為實平方開之得股股弦求勾同法蓋一弦
實藏一勾一股之實一勾一股之實併得一弦實也數
非兩不行因勾股而得弦因股弦而得勾因勾弦而得
股三者之中其兩者顯而可知其一者藏而不可知因
兩以得三此勾股法之可通者也至如遠近可知而高
下不可知如卑則塔影高則日影之類塔影之在地者
可量而人足可以至於戴日之下而日與塔高低之數

不可知則是有勾而無股弦三者缺其二數不可起而勾股之法窮矣於是有立表之法蓋以小勾股求大勾股也小勾股每一寸之勾為股長幾何則大勾股每一尺之勾其長幾何可知矣此以人目與表與所望之高三相直而知之也人目至表小弦也人目至所望之高大弦也又法表為小股其高幾何與至塔下之數相乘以小勾除之則得塔高蓋橫之則為小股至塔之積縱之則為小勾至塔頂之積縱橫之數恰同是變勾以為

股因橫而得縱者也勾股弦三者有一可知則立表之法可得而用若其高與遠之數皆不可知而但目力可及如隔海望山之類則勾股弦三者無一可知而立表之法又窮矣於是有重表之法蓋兩表相去幾何為影差者幾何因其差以求勾股亦可得矣立表者以通勾股之窮也重表者以通一表之窮也其實重表一表也一表勾股也無二法也

勾股容方圓論

凡奇零不齊之數準之於齊圓準之於方不齊之圓準於齊之圓不齊之方準於齊之方勾股容圓準於勾股容方假令勾五股五弦七有奇此為整方均齊無較之勾股其容方徑該得勾之半蓋容方積得勾股全積四分之一其取全積時勾股分在兩廡則勾五股五五二十五內一半為勾積一半為股積其求容方則併勾股為縱一廡得十為長之數得濶二五與原勾相半蓋始初則一半勾積一半股積橫列之而為正方及取容

方則股積在上勾積在下而為長方矣其容方所以止得半勾者則以勾股之數均也若勾短股長則容方以漸而濶不止於半勾矣故大半為股積小半為勾積其始橫列時勾積與股同長而不同濶其從列時則股積之濶如故而勾積截長以為濶則濶與股積同而長與股積異與橫列正相反此變長為濶而取容方之法也其謂之勾積股積者從容方徑與勾股相乘之數而名之也若取容圓徑則用勾股自之而倍其數以勾股與

弦併為法蓋容圓之徑多於容方方有四角與弦相礙
故其數少圓循弦宛轉故其數多若以求容方與求容
圓相比則積中恰少一段圓徑與半弦和較相乘之數
弦和較者勾股併與弦相較之數也假令勾五股五相
乘亦倍之得五十如求容方則亦倍勾股為法得二十
亦恰得二寸五分之徑如求容圓則不用倍勾股為法
而用一勾股併與一弦是以一弦代一勾股併也以一
弦代一勾股併恰少一弦和較加一弦和較則亦兩勾

股矣假令一勾股得十倍勾股得二十是取容方之徑
一勾股得十一弦得七恰少一弦和較三是取容圓之
徑其所以少一弦和較者圓徑多於方徑也假令取容
圓不用勾股倍積而止用勾股本積則宜用勾股併為
廉而除去半弦和較亦得或約得圓徑之後與半弦和
較相乘添積而以勾股并為廉不除亦得或用勾股倍
積用兩勾股相併為廉而以全弦和較與約得圓徑相
乘添積亦得此改方為圓之妙其機括只寓之於弦和

較間也至於勾股積與弦積亦只於勾股較中求之蓋數起於叅伍叅伍起於畸零不齊也假令股五勾五齊數之勾股則勾股幕倍之即得弦幕蓋兩勾股積而成弦積也至於勾短股長相乘之積則成一長方倍之而弦側不當中徑亦不成弦幕惟以一勾股較積補之乃能使長方為一正方而得弦積蓋勾股之差愈遠則長方愈狹長方愈狹則勾股之差積愈多故勾股差者所以權長方不及正方之數以相補轆此補狹為方之法

也

弧矢論

凡弧矢算法準之於矢而參之於徑背徑求矢之法先求之背弦差而半背弦差藏之矢冪與徑相除之中倍矢冪與徑相除則全背弦差也半法簡捷故用其半冪者方眼也自乘之數必方故謂之冪假令徑十寸截矢一寸一寸隅無開方即以一寸為矢冪而以十寸之徑除之該得一分是半背弦差一分若二寸矢開方得四

寸是為一寸者四半背弦差得四分三寸矢開方得九
是為一寸者九半背弦差得九分皆準之於十寸之徑
故一寸之冪而差一分遞而上之視其冪以為差之多
少又假令徑十三寸矢冪一寸則以十三寸之徑與一
寸相除每寸該差七釐七毫弱以為半背弦差若二寸
矢開方得四該四箇七釐七毫併之得三分八毫以
為二寸矢半背弦差此準之十三寸之徑亦遞而上之
視其冪以為差之多少蓋徑長則背弦之差減故一寸

矢而差止七釐有奇徑短則背弦之差增故一寸矢而
差及一分雖其數有增減而準之於一寸之冪與徑相
除而以漸開之每得一寸則得元差而相併以為背弦
之差則其法之一定不可易者也背徑求矢矢背求徑
諸法消息管於是矣至於徑積求矢一法古法以倍截
積自乘為實四因截積為上廉四因直徑為下廉五為
負隅與矢相乘以減下廉而以上下廉與矢除實今立
一法但以截積自乘為實而遂以截積為上廉直徑為

下廉每一寸矢帶二分五釐二寸矢則帶五分四分而增其一以減徑其倍積四因之法悉去不用頗為簡捷蓋徑積求矢準於矢徑之差矢徑差者矢徑互為升降也矢一寸則該減徑一寸二分五釐矢二寸則該減徑二寸五分而矢徑之差起於積數之不足且夫圓準於方而畸零之圓又準於均齊之圓以方為率徑十寸矢一寸則積必是十寸矢二寸則積必是二十寸但得積為實只約矢與徑為從平方開之足矣蓋方無虛隅也

又以整圓為率徑十寸矢五寸則圓積必居方積四分之三而以四之一為虛隅足矣蓋雖有虛隅而其數易準也惟是矢以漸而短則積以漸而減有不能及四分之一者矣於是平之三虛隅以漸而加有不止於四分之一者矣於是平方法與四分而一為虛隅之法皆不可用惟自乘平方之積為三乘而以四分之矢減五分之徑則不問矢之長短積與虛隅之多寡而其數皆至此而均齊猶之平方之法數有多寡而減來減去必得以均齊之數以為

準而後不齊者皆齊此天然之妙也夫積自乘而為三
乘方之實則一整方耳而矢數藏焉及立法求矢則分
為上下兩廡而矢數著焉蓋整方所以聚積而分廡所
以散積補短截長而方圓斜直通融為一此亦天然之
妙也假令徑十寸矢一寸積該三寸五分自乘該十二
寸二分五釐上廡三寸五分下廡十寸以三乘方開之
而一寸無開方則上下廡如元數共得十三寸五分為
廡法與一寸矢相乘除實恰少一寸二分五釐是為負

隅之數所以用每天一寸則帶二分五釐為準以減徑
然後法實相當也又如徑十寸矢二寸積該十寸自乘
該百寸上廉十寸下廉亦十寸以三乘方開之則須以
矢數乘上廉上廉該得二十寸蓋長十寸而高二寸之
數以矢數自乘得四而乘下廉下廉該得四十寸蓋高
十寸而濶四寸之數上下廉共得六十寸又以矢二寸
為方面與上下廉相乘除實共二箇六十寸該得一百
二十寸其數乃足而元數止得百寸恰少積二十寸所

以用二寸五分以除下廉則該止得七寸五分為下廉
其下廉減去高二寸五分中濶該四寸則四箇二寸五
分該得十寸方面二寸與十寸相乘共二十寸恰勾負
隅之數所以二寸矢則用二寸五分減法也遞而上之
每寸以二分五釐為準蓋雖徑有極長極短而一寸寸
矢帶二分五釐減徑之法則定數也徑積求矢矢積求
徑徑矢求積諸法消息管於是矣然此二法者背弦之
差則隨徑而不隨矢所以均為一寸之矢而其差則有

多寡之不齊矢徑之差則隨矢而不隨徑所以但得一寸之矢則不問徑之長短而一例為差此二法之異也若以今法與舊法相通今法不倍積所以不用四因四因者生於倍積也古法之五為負隅即今之一寸帶二分五釐也蓋以五乘之矢除四因之徑則亦一寸矢而減一寸二分五釐之徑也然有廩而無方隅者蓋截積止得廩數也即此二法可見截弧截積之法皆從邊起而準之於邊以漸消息之矣既得一寸之定差則雖倍

從十伯錯綜變化而皆不能出乎範圍之外此天然之妙也故曰握其機而萬事理矣其弦矢求徑法半弦自乘為實而以矢除之加矢得徑是徑之數藏於半弦冪與矢相除而加矢之中也今環而通之以為背弦求矢諸法背弦求矢其半背冪中藏一箇半弦冪與矢相除而加矢之徑數藏一箇矢冪以徑數相除為背弦差之數二數消息恰得半背冪本數則矢數見矣假令徑十寸矢一寸半背弦差一分半背數三寸一分自乘得九

寸六分一釐其九寸為弦冪所謂中藏半弦冪與矢相除而加矢之徑數其六分一釐乃是兩半背冪而空其一差亦名差與半背相開方之數即以與其差一分相乘之數所謂一箇矢冪以徑數相除為背弦差之數也二數消息以盡背冪而法可立矣其背矢求弦法若背矢先求出徑而後以矢徑求弦則為簡捷蓋半背冪中所藏弦冪與背弦差冪今以矢冪約徑而以徑除矢冪為背弦差冪本數則徑數見矣得徑而弦在其中矣其

矢弦求背亦須先得徑而後得背蓋半弦冪為實乃以
矢約徑以矢減之以矢乘之恰得半弦冪本數則徑數
見矣得徑而背在其中矣假今天一寸半弦三寸自乘
九寸為半弦冪為實以矢約徑得十寸以矢一寸減之
得九寸以矢一寸乘之得九寸恰與半弦冪相同則為
徑十寸矣此背弦矢徑四者相乘除循環無窮之妙也
至於徑積求矢則既然矣因而通之積矢求徑假令徑
十寸矢一寸積三寸五分自乘該十二寸二分五釐乃

以原積三寸五分為上廩一寸之矢為下廩以除自乘之積餘數得八寸七分五釐如矢帶數一寸二分五釐則為徑十寸矣又如徑十寸矢二寸積十寸自乘寸百為實矢乘積得二十寸為上廩再矢自乘得八為下廩以二乘上廩消積四十以八消餘積六十得七寸五分加八矢帶數二寸五分則徑十寸矣徑積求矢則積為上廩而徑為下廩矢積求徑則亦積為上廩而矢為下廩此其縱橫往來相通之妙而一乘上廩再乘下廩則

三乘開方之定法也積矢求弦則倍其積以矢除積而減矢弦矢求積則并矢於弦以矢乘積而半其積蓋矢弦并之為長以矢乘之而得兩積故半之而積可見也倍之則為矢弦相併之積以矢除之而得矢弦相併之本數除矢而弦可見也徑矢求積則先得弦而後得積蓋以矢減徑以矢乘之四因得數而弦藏於其中平方開之得弦乃以矢自乘以矢與弦相乘合二數而半之則得積矣此又積矢徑弦四者相乘除循環無窮之

妙也其徑背求天法則以半背自乘為實而約天以減
徑以天乘之為半弦冪而平方開之以減背其減餘之
數恰與天之背弦差數相當則天數見矣蓋半背數中
藏一半弦數藏一背弦差數故合二數而消息之也徑
十寸天一寸半背三寸一分十寸之徑每一寸天該差
二分二寸天該差四分為定差今約天一寸以減徑得
九寸以天乘亦得九寸平方開之得三寸為半弦以除
半背而餘一分恰勾一寸差數則天之為一寸也無疑

矣又如徑十寸半背四寸四分約得矢二寸以減徑餘
八寸以矢乘得十六寸為弦冪平方開之為四寸以減
半背四寸而餘四分恰得二寸矢之定差則矢之為二
寸也無疑矣又法半背冪自乘為實中藏一箇半弦自
乘之數一箇背弦差與兩半背而空出一差相乘之數
亦名背弦差與背相開方之數以此兩數與實相消而
矢數見矣假令徑十寸半背三寸一分其半背冪該九
寸六分一釐約矢一寸與徑相減相乘如前法得九寸

以除實九寸而以一寸之差一分與兩半背而空出一
差之數得六寸一分與上差一分相乘得六分一釐并
二數九寸六分一釐除實恰盡以是知矢之為一寸也
又如半背四寸四分自乘得十九寸三分六釐為實約
矢二寸與徑相減相乘如前法得十六寸以除十六寸
而以二寸之差四分與兩半背而空出一差之數得八
寸四分與上差四分相乘得三寸三分六釐併二數十
九寸三分六釐除實恰盡以是知矢之為二寸也此其

法亦始於先得定差而約天與徑兩相消息以得矢也
其徑數有長短差數有多寡亦準此法而通之也在先
得定差而已又法半徑自乘為徑冪半背自乘為背冪
二冪相乘為實乃約天以減徑以矢乘之為半弦冪與
徑冪相乘以除實又以徑冪除其餘實恰得矢數之定
差則天可得矣蓋二冪相乘中藏一箇徑冪與弦冪相
乘之數藏一箇徑冪與半背弦差冪相乘之數而背弦
差者天之所藏也假令徑十寸矢二寸背差八分半徑

自乘得二十五寸半背自乘得十九寸三分六釐相乘得四百八十四寸為實及約矢得二寸以減徑而乘之得十六寸為弦冪與徑冪相乘得四百以除實餘八十四寸又以徑冪除之得三寸三分六釐恰與二寸矢之定差相合然二寸矢之定差四分而乃有三寸三分六釐者蓋始求背冪之時以兩背數相乘則四分寓其間恰得此數所謂差與背相開方之數也以四分與八寸四分相乘得三寸三分六釐故定差四分而其積則三

寸三分六釐也以八寸四分除之則定差本數也夫背弦差者天之所藏也以差立法古未有之而實求天之大機也差徑求天以差與徑相乘平方開之得天差天求徑天自乘以差為從平方開之得徑而差與弦亦可以求天徑半弦之冪天除徑而天乘徑之數也差者天冪而徑除之之數也先約徑天數與弦冪相同而又以徑除天冪與差數同則得天徑差與背求天徑減差則得弦即差弦求天徑也積者天與弦并以天除而半之

之數也積弦求矢倍積為實約矢而加之於弦為從方
以矢為法除之則得矢也矢積求弦矢自乘而置虛積
與元積相當然後減去矢自乘之冪而以矢除其虛積
與元積之并則得弦也假令矢一寸積三寸五分矢
自乘得寸添積二寸五分乃與元積相當然後減去矢
自乘之寸餘六寸以矢除之得弦六寸也矢二寸積十
寸矢自乘得四寸加虛積六寸與元積相當減去矢自
乘之寸餘十六寸以矢除之得弦八寸也如不以矢徑

求弦得積而遂以天徑求積則天每寸截徑寸二分五釐而以天自乘再乘以乘截餘之徑為徑積然後以徑約積而以積與天自乘之數相乘添入徑積合為積冪而復以約積自乘亦與前積冪同數則積亦可得矣然不如得弦而後得積之為簡捷也至於殘周與弦求天則亦用半弦自乘為實而約出天數以除半弦冪而加天為徑乃以徑補出全周之數而以半背數除半弦數餘為半背弦差恰得天之定差則天可得矣假令弦六

寸殘周二十三寸八分則以半弦自乘得九為實而約出矢一寸以除實而加之得十寸為徑該周三十寸除殘周數得半背三寸一分除半弦三寸而餘一分恰得一寸矢之定差則矢一寸也又如弦八寸殘周二十一寸二分半弦自乘得十六為實約出矢二寸以除實而加之得十寸為徑該周三十寸除殘周數得半背四寸四分除半弦四寸而餘四分恰得二寸矢之定差則矢二寸也數雖如是而起算極周折惟求之弦矢徑三相

權則其數可準蓋徑矢求弦則以矢減徑以矢乘之為半弦冪徑弦求矢則以半弦自乘為實而以徑為益方以矢減益方而相乘除實亦是以矢減徑以矢乘之而得半弦冪也弦矢求徑則以半弦自乘以矢除之加矢而得徑由是三者輾轉求之則是半弦冪中藏却以矢減徑以矢乘之之定數以是約出矢徑而因徑以為周減其殘周而得背以半背與半弦相較而得差恰與矢之定差相同則矢數無所失矣其有不合則更約之此


數雖若眇茫然準之於以矢減徑即以矢乘必須與半
弦冪相當則亦未嘗無繩墨也此意玄之又玄非至神
莫知也積也矢也徑也弦也背也殘周也差也凡七者
轉相為法而轉相求共得三百二十六法而後盡渾然
一圓圈而中含錯綜變化乃至於此嗚呼豈非所謂至
妙至妙者哉

書瘞枯骨志碑陰

始余與褚生之欲瘞枯骨也蓋偶有感於所見而未暇

徧所不及者也偶盡一二人之力所能及以無歎乎此
心之所感而非有意於人之我同也偶以河壩不毛之
隙地可以瘞焉而非有擇於其地也已而朋聞是舉者
競出錢相助而褚生父怡閒翁又以河壩地卑濕逼水
非所以棲骨乃割菜地之一隅以瘞之於是城旁枯骨
得盡瘞焉而又得高燥地以免於後日水嚙之患嗚呼
此可見惻隱怵惕人人所同惟無所感而亦無為之倡
者耳使義舉更有大於此者而有人焉倡之人其有不

翕然而趨之若是者哉君子是以知善俗之有機也因
書出錢人姓名於陰而附著其說云



荊川集卷十二